

罪咎曰作弊內官既已先罷後推亦足懲之且依諫官所啓監司處下書矣不須下獄推之後累啓不允○日暈夜東方南方如火氣坤方有火氣

壬午傳曰武科別試覆試規矩無前例今者文科既不講經武科亦不必講書矣但前例皆有講此意遣史官議于大臣○上御畫夕講○沈連源議國家以武科出身之人參用於牧民之官若用不知書者則其於治事豈不難哉武科之講書以此也別試乃一時特設之舉雖不講書亦似無妨尚震議今此別舉特為覆試者欲選實才俾無僥倖也文斜與選之士至製六篇雖或不講與講無異至於武舉則不然目不知書者容或偶中於國家取人之道亦失其本意宜令該曹磨鍊講一書入格然後許赴殿試似合特舉之盛意尹旣議武科專取弓馬之才若其不講書則不知姓名者亦或冒參將焉用之此所以前無不講之例也况別試所講四書五經武經七書中只自願一書則其所講例不過一卷書并與此而廢之恐非取士之良規傳曰依